

lis Gnovis

■ **CORDENONS.** Sot lis bombis, par 15 dîs

Nol à ancjemò no finit di rivocâ il sunsûr dai bombardaments su la mont Bivare, parsore di Sauris/Zahe, che un'altre purizion de Patrie e scuven preparâsi a gloti il pês des sclavitûts militârs cun armis portatîvis e pesantis, cun mortârs e cun canons «anticarro». Chestes volte, al sarâ fiscât il poligon de Midune e de Celine, tai Cumons di Cordenons e di San Quarin. Il lunari dai bombardaments al cjape dentri lis zornadis dai 5 ai 7, dai 12 ai 14, dai 19 ai 20 e dai 26 ai 27 di Lui; po, vie pal mês di Avost, lis zornadis dai 2 ai 4 e dai 9 ai 10. Intant des esercitazions, a saran impleâts i militârs e lis armis des brigadis «Ariete» e «Pozzuolo del Friuli».

■ **UDIN.** Ecomafiis e cuistion sociâl

Il trafic des scovacis, massime te edilizie, al cres fûr di misure. Il control des emissions, dopo ch'a son sieradis lis Provincis, al è dibot cessât. Il cumierç dai animâi di compagnie al è dificil di controlâ. Po al è ancje il sospet che daûr dal tratament dai vanzums de depurazione e sedi la cuistion dal smaltiment dai prodots tossics. A son chestis chi lis «4 emergjencis» che il dean dal Nucleu operatîf di control ambientâl «Noava», Claudio Freddi, i à segnalât ai 7 di Jugn al «Osservatori regionâl cuintri de mafie». Par altri, il chivali lu à tornât a berlâ, ch'al è pôc, ançe Paolo Storoni de Direzion investigative cuintri de mafie dal Nordest: «Pensâ che chest al sedi dome un probleme dai polizais e no ançe une cuistion sociâl e dal mont des impresis e je une strategie destinade a pierdi».

■ **PARME.** Scuele, pàs e Costituzion

In Friûl al è tornât dispès, come animadôr dal moviment da lis «Scuole per la Pace», e cumò ch'al è pensionât, Aluisi Tosolini al podarà tornâ ancjemò plui dispès. Ancje il «Corriere della Sera», ai 7 di Jugn, al à publicade la gnove, marcant «il saluto commosso degli studenti al preside» che, dal 2008, al à fondât il Liceu scientific musicâl e sportîf «Attilio Bertolucci» di Parme. «Cuâl isal il segret par direzi une scuele ch'è funzione?», i à domandât al diretôr, natif di Tresesin, e lui ur à rispindût: «Fâ rispietà l'articul 3 de Costituzion. Ducj a àn di diventâ citadins libars, atifs e critics». Tosolini al è rivât a Parme par studiâ Teologjie, cul fin di diventâ missionari, ma po al è jentrât tal mont de scuele, dopo di vè studiât Pedagogjie.

■ **PUART.** Il benstâ de «Legre diminuzion»

Domenie ai 26 di Jugn, il Circul «Mdf Livenza-Tagliamento» al organize une zornade di iniziativis par scuverzi il mont de legre diminuzion. La manifestazion, logade li de «Food Forest» di Puart Vieli, e tacarà a 8.45 par là indevant fintremai a 16.30, cu la pussibilitât di gustâ in compagnie. Par dâsi in note al è stât imbastit un modul electronic (<https://forms.gle/1ZwhMPDtkoyYKYX2A>). Il program complet si cjatilu tal profil «Facebook» de clape (mdflivenza.tagliamento@gmail.com).

■ **PASSARIAN.** Salvâ lis lenghis locâls

«Unpli», «Ali Lazio» e Centri internazionâl «Eugenio Montale» a àn publicât il regolament pe diesime edizion dal premi leterari «Salva la tua lingua locale» (www.salvalatualinguale.it). Ducj i autôrs ch'a doprin dialets o lenghis locâls par scrivi in prose o in poesie, o parisi di teatri o a strichis e ançe cjantis a varan di consegnâ lis sôs voris artistichis dentri dai 3 di Otubar. La sezion dal concors dedicade a Tullio De Mauro e je riservade a lavôrs scientifics, publicâts o ineditis.

Mercus 15	S. Proto di Aquilee m.	Domenie 19	Corpus Domini
Joibe 16	S. Aurelian vescul	Lunis 20	S. Etor martar
Vinars 17	B. Rainîr rimit	Martars 21	S. Luîs Gonzaga
Sabide 18	S. Marine vergjine	Il timp	Cjalt e seren



Il soreli
Ai 15 al jeve aes 5.15 e al va a mont aes 21.



La lune
Ai 21 Ultin cuart.

Il proverbi
Cui ch'al menace al vif cun pôre.
Lis voris dal mês
Cimait i fasûl rampighins e lis favis. Se i vuestris pomârs a àn dât fûr masse pomis, viodêt di rarî i ramaçs.


Sbandî lis armis nucleârs

Lis atomichis di Davian e di Ghedi no son legâls

Dai 21 ai 23 di Jugn, si riunissin a Viene i Pais dal mont ch'a àn aderit al Compât internazionâl «Tpnw» («Treaty on the Prohibition of Nuclear Weapons»), in vore dai 22 di Zenâr di an passât. D'in ch'è di, pe prime volte te storie dal Dirit internazionâl, al esist un Acuardi vincolant ch'al improibis il possès, l'ûs e il stazionament des armis nucleârs.

In zornade di vuê, no si sa ancjemò se l'Italie, ch'è jentre te clape dai Pais che no àn ancjemò no firmât il Compât (in convigne cui 9 Pais dal mont ch'a àn bombis atomichis e cui lôr aleâts), e cjararà part a la riunione austriache, prudelade a dute fuarce dal Vatican. Tant e tant, ai 18 di Mai, la Comission Afârs forescj de Cjamar dai Deputâts e à votât une Risoluzione «Sull'impegno dell'Italia a favore del disarmo nucleare» (n. 7-00766) par domandâi al Guvier «di considerâ l'ipotesi di presentâsi a Viene come osservadôr» e di operâ par «svicinâsi ai contignûts» dal Compât internazionâl, cemût che la campagne «Italia, ripensaci» de «Rêr taliane pàs e disarmament» e domande dal 2016 (<https://repeacedisarmo.org/disarmo-nucleare/italia-ripen-saci/>).

In prevision de convigne di Viene e stant ançe che, tal mês di Avost cu ven, a New York e je programade la convigne ch'è varâ di tornâ a scrutinâ il «Compât di No proliferazion nucleâr» dal 1968, la Campagne internazionâl pe abolizion des armis nucleârs «Ican» (www.icanw.org) e je daûr a immanê, dai 18 ai 19 di Jugn, une assemblee de societât civil. Ai 20, po, e colarâ la convigne internazionâl dai guviers sul impat umanitari des bombis atomichis. «Lis armis nucleârs a àn un impat su ogni persone e, par chel, la nestre convigne e sarâ il lûc dulà che ogni vòs e podarà jessi scoltade – e à declarât la



Te mape «Wikimedia Commons», i Pais part dal Compât pe improibizion des bombis atomichis a son colorâts di vert; i Pais firmataris di zâl

A Viene, si dan dongje dai 18 ai 23 di Jugn citadins e Pais cuintri de vuere nucleâr

diretore di «Ican», Beatrice Fihn –. Viene e varâ di diventâ il lûc dulà che, creant un plan globâl di disarmament nucleâr, il mont i rispuint a chel om ch'al è daûr a ricatâl cu lis armis nucleârs, biel ch'al comet crimînâi di vuere».

La cuistion des bombis atomichis e je diventade indaûr centrâl e spaventevol massime di cuant ch'è je sclopade la vuere de Ukraine e sore il dut intai Pais de «Nato» che ur dan acet a lis armis nucleârs dai Stâts Unîts.

In Italie, 22 clapis pacifistis i àn comissionât a la sezion taliane de clape dai juriscj ch'a operin pe eliminazion des bombis atomichis e pal infuortiment dal Dirit umanitari, «Ialana» («International Association of Lawyers Against Nuclear Arms»), un parè juridic sul stazionament di chês armis tes basis militârs di Davian (Pordenon) e di Ghedi (Brescia).

Lis conclusions dai avocats Joachim Lau e Claudio Giangiacomo a son stadis publicadis tal volum «Parere giuridico sulla presenza di armi nucleari in Italia», saltât fûr ai 26 di Mai. «Il studi al risulde une denunzie clare de ilegalitât da la presince des bombis atomi-

chis sul teritori talian – e pant Daniela Padoan de clape «Laudato si», te jentrade popolarizade ançe dal quotidian «Avvenire» dai 28 di Mai –. Chê presince e je un strapaç dal Compât di pàs dal 1947 e dal Compât di No proliferazion dal 1968, ch'al à stât ratificât dal nestri Pais dal 1975, in plui che di altris normis statâls e internazionâls.

Considerât che «il guvier talian ancjemò nol à mai ametût ma nol à nancje mai dineât la presince di bombis atomichis sul teritori statâl» e che, seont l'osservatori su lis spesis militârs «Milex», i coscj di cheste presince a puedin rivâ sui cent milions di euros ad an, la puarte vòs di «Laudato si» e invide i «citadins dal mont» a oponisi «ai interès ch'a fasin de violence e de muart un afâr gras globâl. Il podè nucleâr – e scrîf Padoan – al è il contrari de democrazie, al è un podè esclusif, politic e militar, sierât, sordîr, che, cence nissun control, i da slas a un arbitri su vite e muart des Comunitâts umanis e dai ecosistemis. Nissun drit di autodifese dai Stâts nol passe inant dal drit di vivi da l'Umanità».

Mario Zili

Tradizions furlanis dal mês par cure di **Mario Martinis**

IL CORPUS DOMINI

Il Corpus Domini e je la solenitât cristiane che e ricuarde la istituzion de Eucaristie te ultime cene di Jesù cun chel caratar maestôs che te Joibe Sante nol jere pussibil sigurâ ae memorie, e che partant e torne a proponi 60 dîs dopo Pasche. La solenitât, e je mobile, e cussì e pues colâ dai 25 di Mai ai 28 di Jugn di ogni an. Spostade dal Vatican tai agns Setante dal Nûfcen de joibe a la domenie seguitive su richieste dal governo Andreotti, chest an si celebre il 19 di Jugn. Te tradizion furlane il Corpus Domini al jere diventât ançe une des fiestis plui popolârs, tant di cjapâ la impuartance dal Nadâl e de Pasche. La ceremonie religiose e proviodeve une grande procession jenfri la Messe grande pes stradis pai pais, dulà che il Santissin al vignive puartât ançe sot arcadis di frascj sverdegjantis preparadis pe fieste, daûr lis frutinis vistudis di blanc o cul vistit de Prime comunione che a sparîçavin flors e jerbis pe strade. Intant che bugadis di incens jessudis dal turibul a jentravin pai barcons des cjasis insiorâts di



simbul evident.

Se al sierave la Vierte, il Corpus Domini al anunziave aromai l'Astât, tantis voltis logantsi dongje dal solstizi di Jugn par vie de Pasche «alte» In tâl maniere, al cjapave ançe la funzion di «puarte» o fieste di vierzidure de Astât, in pratiche cemût che a jerin stâts il Nadâl pal Unvier e la Pasche pe Vierte.

mantii e di vâs di rosis e lis cjampanis a sunavin a fieste. Dutis lis fameis a partecipavin ae bieles solenitât cristiane, vielis e canaie, oms e feminis, e ducj a metevin i vistits di fieste. Cun di fat, il Corpus Domini al rapresentave une sorte di «sume» des fiestis de Vierte dopo Pasche, Sense e Pentecostis, coronantint la fin traviere une concentracion di significâts sacris e simbolicis metûts adun in chest moment di «passaç stagjonâl». Cun di plui, come che si è dit, la fieste e cjapave in se i elements arboreis dal «mai», che lis infloradis, lis sgjarnetis, lis frascj e i ramaçs metûts dilunc lis stradis pal passaç dal Santissim 'ndi jerin il